

# Calon mungkin diwajibkan kuasai Bahasa Melayu

BH 25 FEB 2000

KUALA LUMPUR, Khamis – Calon pilihan raya bagi kerusi Parlimen dan Dewan Undangan Negeri pada masa depan mungkin diwajibkan menguasai Bahasa Melayu dengan baik sebelum dibenarkan bertanding.

Menteri di Jabatan Perdana Menteri, Datuk Dr Rais Yatim, berkata cadangan itu akan dikemukakan bagi pertimbangan jawatankuasa penyelarasan undang-undang Suruhanjaya Pilihan Raya (SPR) untuk dijadikan sebagai syarat.

“Seseorang yang cuai dalam penguasaan bahasa kebangsaan yakni Bahasa Melayu tidak harus dipertimbangkan untuk menjadi pemimpin atau untuk mewakili rakyat,” katanya di lobi Parlimen di sini, hari ini.

Rais mengulas mengenai cadangan Bung Mokhtar Radin (BN-Kinabatangan) supaya SPR mensyaratkan hanya calon yang fasih Bahasa Melayu layak untuk bertanding dalam pilihan raya pada masa akan datang.

Bung Mokhtar membuat cadangan itu ketika Rais menggulung perbahasan usul menjunjung kasih titah ucapan Yang di-Pertuan Agong bagi Jabatan Perdana Menteri di Dewan Rakyat, hari ini.

Rais berkata, hal berkaitan bahasa kebangsaan amat penting dan harus diberi perhatian sewajarnya oleh semua pihak terutama pemimpin.

Beliau berkata, sekiranya seseorang ahli dewan tidak tahu berbahasa Melayu dengan baik atau tidak boleh berkomunikasi ini bermakna beliau sudah mengabaikan satu daripada syarat penting dalam politik dan pentadbiran kerajaan.

“Pandangan ahli Kinabatangan itu positif dan saya tidak ada kebimbangan mengemukakan untuk ditimbangan SPR.

“Kita akan bahaskan pandangan ini secara terperinci dan oleh kerana saya dapati ia sangat positif, kemungkinan besar perkara ini akan menjadi kenyataan,” katanya.

Rais berkata, disebabkan ketiadaan syarat itu maka didapati penguasaan Bahasa Melayu beberapa ahli Parlimen sekarang masih lemah atau pada peringkat awal.

Katanya, walaupun kelemahan itu biasanya dapat diperbaiki atau diatasi wakil rakyat terbabit dalam masa setahun, perkara ini perlu diatasi pada peringkat awal lagi.